

आकाशवाणी

खबरां पवन वर्मा कोला

- प्रधानमंत्री नरेन्द्र मोदी होर अज्ज बिहार ते पच्छिम बंगाल दा दौरा करगन ते उत्थे केई विकास परियोजनाएं दा उदघाटन ते नीह पत्थर रखगन।
- भारतीय रेलवे नै त्योहारें लेई 380 गणपति स्पैशल ट्रेनें दी घोषणा कीती ऐ।
- ISRO नै आक्खेया जे गगनयान दी परीक्षण उड़ानां दिसम्बर च शुरू करोग।
- Election Commission नै उपराष्ट्रपति दे चुनां लेई 2 Observer नियुक्त कीते।
- मॉस्को दौरे दुरान विदेशमंत्री एस.जयशंकर होरें रुस दे राष्ट्रपति व्लादीमीर पुतिन हुंदे कन्नै मलाटी कीती।
- ते जम्मू-कश्मीर दे शिकारे आले मोसीन नै “खेलो इंडिया वाटर स्पोर्ट्स फेस्टीवल-2025” च सुन्ने दा तगमा हासल कीता ऐ।

<><><><><><>

PM-Bihar/ WB Visit

प्रधानमंत्री नरेन्द्र मोदी होर अज्जै थमां बिहार ते पच्छिम बंगाल दे दौरे पर होडन। इस दुरान श्री मोदी होर बिहार दे गया च 13 जहार करोड़ रुपें शा मते दिएं विकास परियोजनाएं दे नीह पत्थर रखडन ते उदघाटन बी करडन। तोआई पच्छिम बंगाल दे दौरे दुरान प्रधानमंत्री होर 5 जहार 200 करोड़ रुपें शा मते दिएं विकास परियोजनाएं दा नीह पत्थर रखडन ते केई परियोजनाएं दा उदघाटन करने दा कार्यक्रम ऐ। श्री मोदी

होर कोलकाता च नमीं बनाई गेदी सैक्शनें पर मेट्रो ट्रेन सेवाएं गी बी शुरु करोआडन। एहदे अलावा ओह 7 इशारिया 2 किलोमीटर लम्मे ते 6 लेनें आहले कोना एक्सप्रेस-वे दा नीह पत्थर बी रक्खडन- जेहदे निर्माण उप्पर 12 सौ करोड़ रुपें दी लागत औग। इस पैहलकदमी कन्ने हावड़ा ते कोलकाता ते होरनें बक्ख-बक्ख इलाकें बश्कार संपर्क सुविधा च खरा मता बाददा होग।

<><><><><><>

Railways

रेलवे, त्योहारें दे मौके पर श्रद्धालुएं ते यात्रियें दी सुगमता आस्तै 380 गणपति वशेश यात्री रेलगड्डियां चलाग। बरे 2023 च इस चाली दी कुल 305 रेलगड्डियां चलाइयां गेइयां ही, पर पिछले बरे इन्दी गिनतरी बद्दियै 358 होई गेई। रेल मंत्रालय नै इक ब्यान च आक्खेया ऐ जे महाराष्ट्र ते कोंकण खेतर च त्योहारें दे दौरान यात्रियें दी मंग पूरी करने लेई मध्य रेलवे सभनें शा मतियां 296 बशेश रेलगड्डियां चलाग। पश्चिम रेलवे 56, कोंकण रेलवे 6 ते दक्खन पश्चिम रेलवे 22 गणपति बशेश रेलगड्डियां चलाग। गणपति पूजा 27 अगस्त शा 6 सितम्बर तगर मनाई जाहग।

<><><><><><>

ISRO

भारत दे पैहले मानव युक्त अंतरिक्ष मिशन गगनयान दी पैहली परीक्षण उड़ान इस बरे दिसम्बर च होग। देसै च पिछले 10एं बरें च अंतरिक्ष आहले खेतर च बेमिसाल ते दस्सने जोग प्रगति होई ऐ। भारती अंतरिक्ष अनुसंधान संगठन इसरो दे अध्यक्ष वी. नारायणन होरें कल नमीं दिल्ली च संवाददाता सम्मेलन च एह गल्ल आक्खी। उनें

आखेआ जे 2015 बरे थमां 2025 बश्कार पूरे कीते गेदे मिशन 2005 थमां 2015 बश्कार पूरे होए दे मिशनें थमां तकरीबन दूने न। उनें आखेआ जे एक्सियोम-4 मिशन प्रतिष्ठित मिशन ऐ कीजे शुभांशु शुक्ला अंतरराष्ट्रीय अंतरिक्ष स्टेशन जाइयै सुरक्षित परतोने आहले पैहले भारती बने। उनें आखेआ जे अंतरिक्ष उद्योग च 300 स्टार्टअप कीते गे न जिसलै के 10 बरे पैहलें इंदी गिनतरी छड़ी 1 ही। इस मौके पर ब्हाई सेना दे ग्रुप कैप्टन ते अंतरिक्ष यात्री शुभांशु शुक्ला होरें एक्सियोम मिशन गी मुमकन बनाने लेई केंद्र सरकार ते इसरो दी टीम गी धन्नवाद कीता। उनें आखेआ जे इस मिशन थमां हासल जानकारी भारत दे औंदे गगनयान मिशन ते भारत अंतरिक्ष स्टेशन स्थापित करने लेई बड़ी कारी दी सिद्द होग। ग्रुप कैप्टन शुक्ला होरें स्वदेशी मानव अंतरिक्ष मिशन दे सुखने गी सच्च करने च देसै दी समर्थ पर पूरा भरोसा दस्सेआ। विज्ञान प्रौद्योगिकी मंत्री जितेंद्र सिंह ते गगनयान मिशन पर जाने आहले सदस्ये च शामिल ग्रुप कैप्टन प्रशांत बालाकृष्णन होरें बी प्रेस वार्ता गी संबोधित कीता।

<><><><><><>

Shivraj Lakhpati Didis

केन्द्री राई-बाई ते करसान कल्यान मंत्री शिवराज सिंह चौहान होरें आखेया ऐ जे देसै दी तकरीबन 2 करोड़ 80 लख महिलां, लखपति दीदी बनी गेदियां न। नमीं दिल्ली च कर्मचारी संकल्प सम्मेलन गी सम्बोधित करदे होई श्री चौहान होरें आखेया जे प्रधानमंत्री नरेन्द्र मोदी होरें 3 करोड़ लखपति दीदी बनाने दा लक्ष्य रक्खे दा ऐ।

<><><><><><>

Reddy Coal Import

केन्द्री कोयला ते खान मंत्री जी. किशन रेड्डी होरें आक्खेया ऐ जे जन्दे बरे दे मुकाबले च कोयले दे आयात च 9 फीसदी दी कमी आई ऐ। नमीं दिल्ली च जंदे रोज बपार सरबन्धी कोयला खदानें दी नीलामी दा 13मां दौर शुरु करदे होई श्री रेड्डी होरें आक्खेया जे, देश दी बददी ऊर्जा जरूरतें दे कन्नै कोयले दी मंग लगातार बदा रदी ऐ। उनें आक्खेया जे सरकार आसेया निर्धारित सुधार, प्रदर्शन ते बदलाव दे दृष्टिकोण गी पूरा करने च कोयले दा उत्पादन महत्वपूर्ण भूमिका निभाग। उनें आक्खेया जे बपार सरबन्धी खनन पैहल कन्नै निजी भागीदारी दे मौकें खुलगंन, जेहदे कन्नै रोजगार पैदा होग। श्री रेड्डी होरें दस्सेया जे 12 गेड़ें च 134 कोयला खदानें दी नीलामी होई, जेहदे कन्नै 41 जहार 600 करोड़ रुपें दा निवेक्ष आकर्षित होआ ते 3 लक्ख 50 जहार शा मते रोजगार दे मौकें पैदा होए। उनें आक्खेया जे 13में गेड़ च 14 कोयला खंडें दी नीलामी कन्नै आयात पर निर्भरता च होर कमी औहग ते विदेशी मुद्रा हासिल होग।

<><><><><><>

ECI

चुनां आयोग नै उपराष्ट्रपति चुनां आस्तै दो पर्यवेक्षक नियुक्त कीते न। पंचायती राज मंत्रालय च अपर सचिव सुशील कुमार लोहानी ते खजाना मंत्रालय च अपर सचिव डाक्टर आनंदन उपराष्ट्रपति चुनां आस्तै पर्यवेक्षक होगंन। चुनां अगले महीने दी 9 तरीक गी होना ऐ। पिच्छले महीने सेहत कारणें करी श्री जगदीप धनखड़ हुंदे इस्तीफे दे मगरा एह चुनां कराना लाजमी होई गया हा। देश च एह 17मां उपराष्ट्रपति चुना होग। उपराष्ट्रपति दा निर्वाचन इक निर्वाचन मंडल करदा ऐ, जेहदे च लोकसभा ते राज्यसभा दे सदस्य हुंदे न। राष्ट्री जनतांत्रिक गठबंधन NDA नै C.P. राधाकृष्णन होरें गी

उपराष्ट्रपति पद दा मेदवार बनाया ऐ, जिसलै के सुप्रीम कोर्ट दे पूर्व न्यायधीश बी. सुदर्शन रेड्डी विपक्षी इंडिया गठबंधन दे मेदवार होगंन।

<><><><><><>

Jaishankar –Putin

विदेश मंत्री डाक्टर एस. जयशंकर होरें क्रेमलिन च रुस दे राष्ट्रपति व्लादीमीर पुतिन हुंदे कन्नै मलाटी कीती। सोशल मीडिया पर इक पोस्ट च डाक्टर जयशंकर होरें आक्खेया जे उनें राष्ट्रपति पुतिन गी प्रथम उप-प्रधानमंत्री डेनिस मंटूरोव ते विदेशमंत्री सर्गेई लावरोव कन्नै अपनी होई दी गल्लबात कन्नै अवगत कराया। उनें एह बी आक्खेया ऐ जे नेताएं दे वार्षिक शिखर सम्मेलन दी तयारियां चंगी चाल्ली चला करदियां न। डाक्टर जयशंकर होरें वैश्विक स्थिति ते यूक्रेन दे हालिया घटनाक्रम पर श्री पुतिन आस्सेया सांझा कीते गेदे विचारें दी सराहना कीती।

<><><><><><>

Khelo India Water Sports

जम्मू-कश्मीर दे श्रीनगर च पैहली बारी Khelo India Water Sports-2025 दी शुरुआत होई ते कल 17 बरे दे शकारे आहले मोहसीन अली नै पैहला सुन्ने दा तगमा हासल कीता। मोहसीन नै डल झील च शकारा चलांदे होई मर्दे दी 1000 मीटर Kayaking Race 4 मिन्ट 12 इशारिया 4-1 च पूरी करियै, ओडिशा ते मध्यप्रदेश दे प्रतिभागियें गी हराई दिता। इक होर मकाबले च उत्तर प्रदेश दे विशाल कुमार नै मर्दे दी Single 1000 मीटर Canoe Race गी 4 मिन्ट 30 इशारिया 5-9 Second च पूरा करियै सुन्ने दा तगमा हासल कीता। महिलायें दी 200 मीटर Canoe Single च ओडिशा दी रस्मिता साहू नै 53

इशारिया 53 Seconds च पूरा करियै केरल ते मध्य प्रदेश दे Athlets गी हराइयै सुन्ने दा तगमा हासल कीता। खेड मंत्री मनसुख मांडविया होरें इस कार्यक्रम दा उदघाटन कीता। उदघाटन समारोह च जम्मू-कश्मीर दे उप-राज्यपाल मनोज सिन्हा सनें केई गणमान्य लोकें हिस्सा लैता।

<><><><><><>

U20 Wrestling C Ship

भारत नै बुल्गेरिया च Under 20 World Wrestling Championship -2025 च 2 होर तगमे जिती लैते न, जेहदे च रीना ते प्रिया मलिक नै अपनी कैटेगरी च चांदी दा तगमा हासल कीता। महिलायें दी 55 Kg. Category च रीना नै चांदी दा तगमा हासल कीता ते उस मकाले च US दियें Everest Leydecker नै सुन्ने दा तगमा हासल कीता। दुई बक्खी 76 Kg. Category च प्रिया मलिक नै चांदी दा तगमा हासल कीता ते Ukraine दियें Nadia Soko Lovska होरें सुन्ने दा तगमा हासल कीता।

<><><><><><>